



ALAHADY FAHA-13 MANDAVANTAONA - TAONA B

*« Anaka, ny finoanao no nahavonjy anao ;
mandehana amim-piadanana » (Mk. 5: 34)*

Ry Kristianina havana, omaly isika no niaraka nankalaza ny fetim- pirenentsika. Ao anatin'izao fotoana mangidy izao no hibanjinintsika ny fiainan'ny firenentsika. Milaza miaramahita fa tsy mbola vita ny ady, mbola manjaka indrisy ny fahantrana izay tena mikiky antsika. Mananatra antsika sahady ny tenin'Andriamanitra izay atolotry ny Eglizy amin'izao Alahady faha-13 izao fa indrindra ny taratasin'I Md Paoly amin'ny vakiteny faharoa. Mbola hiverenantsika lalindalina rehefa avy eo.

Izao Alahady tsotra faha-13 mandavantaona izao ihany koa no alahady amaranantsika an'ity volana Jiona volan'ny Fo Masin'I Jesoa ity ary anombohantsika ihany koa ny fanjava satserdotaly ny mois sacerdotal, volana manandanja ho antsika eto amin'ny diosezy satria fotoana hivorian'ny pretra rehetra eto amin'ny diosezy. Entintsika am-bavaka mba hizotra

izany fihaonana izany. Miavaka tokoa ny fivoriana amin'ity fanjava ity satria miombona amin'ny Eglizy eran-tany isika no hanokatra ny sinaody amin'ny volana oktobra eto amin'ny diosezy. Tsy hoe sinaody roa fa sinaody iray ihany satria hohazavaintsika fa tsy misy kisendrasendra. Tsy

Vakiteny I : Fah. 1, 13-15; 2, 23-25

Tononkira : Salamo 29

Vakiteny II : 2 Kôr. 8, 7. 9.13-15

Evanjely : Mk. 5, 21-43

zava-baovao ny sinaody eto amin'ny diosezy satria nisy hatramin'izay niorenan'ny diosezy. Ireo zokinjokiny mahatadidy izany tsara. Ny Filankevitra Pastoraly diosezianina no vaovao fa matetika ny sektera no manao filankevitra. Ny amin'ity kosa anefa misy zava-baovao satria araka ny fanirian'I Papa ny fankalazana ny Sinaodin'ny Eglizy eran-tany dia hatomboka aty amin'ny Fototra, aty amin'ny diosezy vao miantefa amin'ny Fivondronamben'ny Eveka avy eo vao miroso amin'isan'ny kontinanta ary miafara any Roma. Raha fintinina dia misy étapes telo, misy dingana telo. Mitovy tanteraka amin'ny vinavinantsika izany voalaza izany satria efa naverimberintsika matetika fa tsy maintsy miainga any amin'ny fototra ny

ataontsika raha tiantsika ho latsa-paka amin'ny fiainana ka hamokatra. Angatahantsika àry ny Fahasoavan'Andriamanitra sy ny Fitsilovan'ny Fanahy Masina hanampy antsika. Raha ny sinaody erantany dia ao anatin'ny 3 taona. Ho antsika kosa mba ho latsa-paka tsara ka ho tena “départ vaovao” sy Pantekoty vaovao dia 5 taona no hanatanterahantsika azy. Izany hoe hiara-dalana, hiara-hifampidinika, hiara-hivavaka... fa izany no dikan'ny teny hoe sinaody, mandritra izay 5 taona izay no hanorenantsika ny FIANAKAVIAM-BEN'ANDRIAMANITRA, FIANAKAVIAM-BEN-JANAHARY, FRATELLI TUTTI HANORENANTSIKA NY MAHA OLO ARAIKY ANTSIKA JIABY. Koa isan-taona manomboka amin'ity taona ity dia ho raisintsika ireo lohahevitra fototra avy amin'ireo Annexe efatra vokatry ny Taratasy Pastôraly faha-8. Mbola hisy fanontaniana ho volavolain'ireo vaomiera. Io no atao “Instrumentum Laboris” izany hoe : fitaovana entina miasa, mikatroka. Amin'ity taona ity izany hoe ny lohahevitra amin'ity **Taona voalohany** ity : fianakaviana “eglizy kely” miaramivavaka mandalina ny finoana... **Taona faharoa** : fianakaviana “eglizy kely” miaro ny tontolo aina, **Taona fahatelo** : Fianakaviana “eglizy kely” mifampitsimbina, mifanao soa, mijoro amin'ny marina mikatsaka ny soa iombonana, **Taona fahefatra** : fianakaviana “églizy mandray an-tanana”. **Taona fahadimy** : fianakaviana “eglizy kely” miara-mankalaza. Mety misy fanatsarana sy fanamboarana ireo lohahevitra ireo araka ny dinika entin'ny pretra amin'izao fanjava satserdotaly izao ka ho hitantsika eo. Ny tena zava-dehibe dia efa mazava amintsika ny lalan-kombana ary mifanaraka amin'ny torolalana atolotry ny Eglizy erantany avy any Roma.

Ao anatin'ny fahasoavana koa isika no manomboka izany rehetra izany na dia mbola ao anatin'izao KORONTANAVIRUS izao aza. Io ilay lazaintsika hoe tsy maintsy misy “avant” sy “pendant” ary ny “après”. Manambara départ vaovao sy Pantekoty na dia anatin'izao KORONTANAVIRUS izao ka mahavelom-pantenana tokoa. Tsy inona izany fa ireo fanamasinana amin'ity taona ity. Tsy misy tokoa ny kisendrasendra fa tian'Andriamanitra hambara amintsika tokoa ny sitrapony ary ny zava-drehetra dia entin'Andriamanitra hahasoa an'izay tia Azy. Entintsika am-bavaka ireo fanamasinana eto anivon'ny diosezy ireo.

Mifanaraka tsara, mifanojo amin'ny lohahevitra atolotry ny Eglizy amin'izao Alahady faha 13 izany hetaheta izany, izany vinavina izany. Tsy inona tokoa no tadiavin'Andriamanitra araka ny lohahevitra amin'izao Alahady faha-13 izao fa “Ny hahavelona antsika”, ka hahatonga antsika ho génération mpanorina antsika sy hahatonga antsika ho mpamokatra, izany no maha EOVI MISIONERA TABERNAKLA VELONA ANTSIKA.

Ny vakiteny voalohany Bokin'ny Fahendrena izay manipika mazava tsara fa tsy avy amin'Andriamanitra ny fahafatesana, tsy Andriamanitra no nanao fahafatesana, tsy irin'Andriamanitra na oviana na ovina ny haha-faty fa isika no be siasia ka nanota. Vokatry ny fahotana izany fisarahana amin'Andriamanitra no nahatonga ny fahafatesana. Ny fahotana no nampiditra ny fahafatesana eto amintsika. Ny fialonan'ny demony no

nidiran'ny fahafatesana amin'izao tontolo izao. Voatariky ny demony isika matetika ka toy izay mamelona dia mamono na amin'ny teny ataontsika aza. Fantaro fa tena mamono isika rehefa magnasaha ireny. Ny vava ratsy ataontsika dia tena mamono satria feno fankahalana sy fanilikilihana ka manapotika ny hafa. Matetika isika mamono amin'ny ataontsika hatramin'ny zaza madinika mbola am-bohoka aza tsy manan-tsiny dia efa vonointsika amin'ny fanalana zaza, amintsika magnadoso tsaiky (avortement). Matetika isika voatarika amin'ny asan'ny demony ka zary mamono noho ny fialonana ohatra ny nataon'I Kaina izay namono an'i Abela rahalahiny, zava-misy hatramin'ny voalohan'ny fiandohan'izao tontolo izao ka mitohy hatramin'izao. Indrisy àry mihamafy vokatr'ity KORONTANAVIRUS ity. Ny fahafatesana no mampibaribary ny voka-dratsin'ny KORONTANAVIRUS. Milaza miaramahita isika fa noho ny fahotana dia voasarika isika hanao ny ratsy, manapotika isika ary tsy isika samy isika ihany fa manapotika koa ny zava-boahary amin'ny fandroana ala. Fantaro fa ireo motro, afo ataontsika dia manapotika ny ala ary ny taranaka no maty vokatr'io motro ataontsika io. Io no lazain'ny Eveka amin'ny taratasy hafatra Pantekoty nataony. Izay mandoro ala mamono taranaka. Fahafatesana izay misy demony fa izay itoeran'i Jesoa sy mitoetra ao amin'i Jesoa dia miova ny fiainany. Averimberintsika matetika fa mila ny fiovana sy fanavaozana ny fiainantsika ary raha te-kihavao isika dia aoka hitoetra ao amin'i Jesoa ary hitoeran'i Jesoa satria amin'ny alalan'izany ihany no làlana hahatonga antsika ho génération mpanorina.

Enga anie amin'izao "mois sacerdotal" izao ho tsapantsika eveka, pretra, relijiozy, lahika kristianina miomana amin'izao sinaody izao fa ny mitoetra ao amin'i Jesoa sy itoerany no mahatonga antsika ho EOVI MISIONERA VITA BATEMY KA IRAHINA ZARY TABERNAKLA VELONA manorina FRATELLI TUTTI, manorina OLO ARAIKY.

Tanterahin'i Jesoa izany araka ny ambaran'i Md Marka ao amin'ny Evanjely androany, eo anivontsika tokoa i Jesoa ka mandray azy tahaka an'i Jaira izay vahiny nefa ao amin'I Jesoa tsy misy vahiny na olona manjeny intsony, hoy I Md Paoly, fa Olo Araiky jiaby isika. Ny tadiavina dia isika matoky an'i Jesoa, ary raha matoky an'I Jesoa isika tahaka an'I Jaira dia handray fahasoavana avy Aminy ka hamokatra ny fiainana. I Jesoa tokoa no nampiova ny fiainany. Niankohoka tamin'ny tongotr'i Jesoa I Jaira niangavy an'I Jesoa hanasitrana ny zanany vavy.

Marary ny fiainantsika, marary ny Eglizy, marary ny fianakaviana, marary ny fiaraha-monina, marary ny firenentsika. Izay no mahatonga antsika hampanao ny sinaody miainga amin'ny fototra. Izay ihany koa ny mahatonga antsika manao ny sinaody miainga any amin'ny Eglizy fototra. Aoka ho tahaka an'i Jaira isika hiaraka hitalaho amin'I Jesoa ny mba hositrany ka ho tena aim-baovao no entin'ity sinaody ho antsika ity. Handohalika araky ny voalazan'i Md Paoly isika, hivavaka mba hanana ny tena fitiavana marina satria io no nampiova ny fiainantsika. Koa hiaraka hivavaka isika mba hanatona an'i Jesoa ka izy hanoro antsika ny làlan-kombana. "Aza matahotra fa minoa fotsiny ihany", marina ilaina ny fiekem-pinoana

tsy ho tononina am-bava fotsiny fa ilaina kokoa ny maha latsapaka azy ao am-pontsika dia ho voavonjy isika.

Ny famantarana faharoa dia ao amin'ny Evanjely. Manamafy ny fampianarana voalazantsika teo satria dia tena finoana velona no hita ao amin'ilay vehivavy nitsi-drà, feno finoana izy ka nitady hikasika na ny lamban'i Jesoa fotsiny aza ary sitrana izy satria nino. Na dia kely sy bitika tahaka ny voatsinapy aza ny finoana, hoy isika, dia mampiova zavatra satria ny voro-manidina tonga mialoka eo amin'ny voatsinapy. Na dia kely aza ny finoantsika manomboka izao sinaody izao dia matoky ny Fahasoavan'Andriamanitra ka Izy handavorary antsika ka hamokatra ny sinaody. Mitaky antsika hanana finoana izao andro iainantsika izao. Hiaraka hatrany amin'i Kristy isika satria izany ny maha-Kristianina antsika ka miaraka Aminy isika hanova ny fiainantsika. Raha manatanteraka ny sitrapony isika dia miova ny fiainantsika. Izany hoe raha manao ny asan'Andriamanitra isika dia Andriamanitra no hanao ny asantsika.

Niditra tao amin'ny tranon'i Jaira i Jesoa. Nitondra an'i Piera sy Jakoba ary Joany I Jesoa niditra tao an-trano. Tadidio fa ireo no mpianatra telo izay nentiny nivavaka teny antendrombohitra ary teo imason'izy ireo I Jesoa no niova tarehy. Izany no antenaintsika amin'izao firosoantsika amin'izao sinaody izao. Araky fampianaran'ny Eglizy no entintsika manao ny sinaody mba ho latsa-paka tokoa ny finoantsika. Aoka ny sinaody ataontsika hampiova ny fomba fiainantsika ka hiova tokoa tahaka ireo mpianatra telo nahita ny hatsaran-tarehin'i Jesoa isika ka nilaza hoe "Aoka isika hanorina trano lay eto". Izany koa no niseho tamin'ny zanakavavin'i Jaira, niova izy satria nino ny fisian'i Jesoa.

Efa lo ny fiainantsika vokatr'ity KORONTANAVIRUS ity ary misy aza sahy miteny fa tsy misy azo antenaina intsony fa i Jesoa tonga hanavao ny fiainantsika Izy no fiainana mamelona antsika raha mandray Azy isika sy manaiky hitoerany dia Izy no mampitsangana antsika izy. "Mitsangana", hoy izy tamin'ny zanakavavin'i Jaira. Ny dikany hoe "mitsangana", "mijoro" tsy vitany hoe velona fa tena miverina amin'ny hasina mahaolona. Ny biby no mirefarefa amin'ny tany. Ny zava-mahagaga ataon'Andriamanitra dia misy eo amin'ny fiainantsika ary tsy androany ihany fa hatramin'ny voalohany, tahaka ny hitantsika tamin'ny tantaran'ireo mpaminany toa an'i Elizea satria nampandroso an'Andriamanitra tamin'ny fiainany izy ireo. Izany koa no irintsika amin'izao sinaody izao hampandroso an'i Jesoa amin'ny fiainantsika tsirairay isika. Hampandroso azy amin'ny fianakaviana tsiraikiraiky ka zary "eglizy kely". Hampandroso azy amin'izao "fanjava satserdotaly" izao ka zary senakla tokoa. Hiaradana Aminy isika amin'izao "sinaody" izao fa izany ny dikan'ny hoe "sinaody". I Jesoa hilaza amintsika "mitsangana" ka hiroso isika amin'ny diantsika fa indrindra amin'izao "après KORONTANAVIRUS" izao ka ho Pantekoty vaovao tokoa. Isorantsika Andriamanitra nampahafantatra antsika an'i Jesoa. Enga anie isika samy hahatsapa fa maro ny zavatra manapotika ny fiainantsika na ny fiainan'ny Eglizy na ny fiainan'ny fiaraha-monina na ny

fiainan'ny fianakaviansika, ka aoka isika hahay hampandroso an'i Jesoa mba hahafahantsika mitoetra ao aminy tokoa.

“Ny finoanao no mahavonjy anao”, isika mampiditra an'i Jesoa eo anivon'ny fiainantsika ka mampitoetra azy tokoa ao amintsika ary manatanteraka ny sitrapony dia ny fahamarinana, ny fifankatiavana, ny fahazotoana mivavaka, ny fahatahorantsika azy ary ny fandraisantsika an-tànana, ny fahafoizana.

Manantitrantitra an'izany i Md Paoly ao amin'ny vakiteny faharoa mba hifanampy sy hifarimbona eo amin'ny fiainantsika ka hifanasoa ary hanao asa fiantrana, hikarakara sy hikorokoro, izany rehetra izany no vokatry ny fihavaozana. Mahafofy ny fiainany, mahafofy ny fotoana ary mikatroka tokoa, mijoro ho vavolombelona, manompo. Izany no fanatanterahana ny 5F (Fahafoizana, Faharetana, Fahasahiana, Fanetrentena, Fitiavam-bavaka) sy ny 5M (Mivavaka, Mandalim-pinoana, Mikatroka, Manompo, Mandray an-tànana) hahatonga antsika hahameno izao siny enina araka ny hafatr'i Masina Maria tamin'ny Apostoly ka nahatonga ny finoan'izy ireo marim-pototra tsara.

Mananatra antsika i Md Paoly mba hiroso amin'ny lalindalina kokoa. Volana manandanja amintsika eto amin'ny diosezy tokoa ny volana jolay izao ka aoka hanao vavaka totoafo isika tahaka ny nataon'i Jaira hanao lemojy hitalaho mba hohavaozin'Andriamanitra sy ho sitraniny ity fiainantsika tena efa marofy tokoa.

Ry Jesoa Kristy Tomponay ô, ianao no tompon'ny aina na amin'ny ara-nofo na amin'ny aratsaina fa indrindra ny ara-panahy. Indreto izahay Jesoa mitalaho mba ho velominao lalandava amin'ny tena aina mahavelona izahay dia ny Tenanao sy ny Teninao. Mivavaka koa izahay amin'izao volana jolay fanjava satserdotaly ,mois sacerdotal izao hanomananay ny fanamasinana sady mampiditra anay amin'ny sinaody, enga anie izahay ho tena fiainana feno anao tokoa ka hositranao amin'ireo zavatra mahatonga ny aretina mikiky anay fa indrindra ny aretina nentin'ity KORONTANAVIRUS ity hahatonga anay ho tena génération mpanorina tokoa, ho tena génération mamokatra tokoa. Ny fiainam-pinoanay anie ho tahaka an'i Jaira ka ho sitraninao tokoa izahay ho afaka hijoro vavolombelona ho EOVMISIONERA TABERNAKLA VELONA. Masina Maria Reninay ianao Renin'ny Eglizy kolokoloy, izahay amin'izao sinaody izao hahay hanao “eny” tahaka anao ka ho “tabernakala velona”. Mivavahà mba ho fianakaviana “eglizy kely” ka ny fianakaviana masina tao Nazareta anie no modely ho anay. Md Josefa mivavahà mba ho Baba izahay amin'ny andraikitra nankinina aminay ho Baba mahafofy tahaka anao, ho Baba mijoro amin'ny marina, tsy mivadika amin'ny teny nomena, ho Baba mamelona ny ankohonana nankinina aminay. Amen

Mompera Arseveka Mgr Benjamin Ramarason